



Komunikadu Imprensa
07 Jullu 2020

JSMP apresia estrutura foun Parlamentu Nasionál ba funksionamentu normál plenaria

Hahuu husi inísiu mandatu estrutura foun Parlamentu Nasionál (PN), Maiu to'o Juñu 2020, JSMP observa katak funksionamentu sesaun plenária la'o tuir Lei Nú. 15/2009, Rejimentu Parlamentu nian artigu 46 pontu 1 (a) kona-ba halo reuniaun plenaria iha loron Segunda no Tersa-feira no artigu 46 pontu 2 kona-ba plenaria iha sesaun dadeer no lokraik hahuu husi 09:00 to'o 18:00 lokraik.

“JSMP kongratula no apresia Prezidente Parlamentu Nasionál ho nia estrutura meja Parlamentu Nasionál ne'ebé halo mudansa ba funksionamentu iha sesaun plenaria ne'ebé hahuu la'o tuir oráriu normál funksionamentu parlamentu nian no espera mudansa ida ne'e la'o to'o lejislatura ida ne'e nia rohan atu hatán ba preokupsaun públiku durante ne'e kona-ba efetividade serbisu Parlamentu Nasionál nian ne'ebé ladún produtivu,” dehan Diretora ezekutiva JSMP, Ana Paula Marçal.

JSMP konsidera ho mudansa ida ne'e sei lori pasu pozitivu ba hasae produktividade serbisu Parlamentu Nasionál nian. Nune'e, bele tau prioridade no halo agenda lei pendentu sira liuliu ba ezbosu lei importante sira ne'ebé baixa ona ba Komisaun espesializada sira hanesan Lei Anti Korrupsaun, Lei Ordem Advogadu, Lei Podér Lokál no Dezentralizasaun Administrativa, Lei Eleitóral Munisípal no lei importansia sira seluk atu bele aselera nia prosesu diskusaun no aprovasaun iha lejislatura ida ne'e.

Durante períodu ida ne'e, JSMP consege monitoriza reuniaun plenária normal hamutuk dala 11 no plenária extra-ordinariu dala ida.¹

Maski nune'e, JSMP kontinua preokupa ho deputadu balun ne'ebé kontinua la kumpri Rejimentu Parlamentu hodi tama tarde. JSMP husu ba meja atu toma medida ka sansaun ruma tuir rejimentu atu sira bele kumpri oras serbisu hodi evita aktu hanesan kontinua akontese iha futuru.

JSMP mós husu ba estrutura meja foun Parlamentu Nasionál atu kontinua promove dialogu polítika hodi hamosu konsensu entre bankada opozisaun no bankada Governu nian hodi tau prioridade no interese nasionál ás liu interese partidu nian ho nune'e bele asegura funksionamentu normál serbisu Parlamentu nian hodi bele produtivu liután iha lejislatura ida ne'e nia tempu.

Atu hetan informasaun liután favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
info@jsmp.tl
Website: <http://jsmp.tl>

¹ Info kompletu bele haree iha website PN: <https://www.parlamento.tl/node/405>